

Toni Buhz us der Barbarastroß

Riehler Gedichte
op kölsch

Wachmeister Otto
Dat Ahle Riehler Bad
Zoobesök
Minge Frisör
Fröh am Morje
Unse Maat

präsentiert von dein-riehl.de

Alle Rechte: Toni Buhz

Die Vervielfältigung, Bearbeitung, Verbreitung und jede Art der Verwertung bedarf der schriftlichen Zustimmung des Autors. Anfragen: toni.buhz@gmx.de

Wachmeister Otto

En unsem Veedel läv ne Mann
För dem de Puute Achtung han.
Als Polizis in jeder kennt,
„Dorfsheriff“ mer in och nennt.
Dat hä met Name „Otto“ heiß,
Alt un Jung, koot jeder weiß.

Letz ne Puut noch quere kunnt
Bei „Jäl“ de Stroß, wo hä jrad stund.
Ich frochten mich, jeit dat wal jot?
Dä Polizis doch ärch streng loot.
Doch dä Stropp jeit zo im keck
Un im et flache Hängche reck.

Wachmeister Otto ävver nemmp
Ne Bungksteff us der Täsche vum Hemp,
Molt e Jeseech em jroße „O“
Zwei „t“ en „o“ och noch dozo.
Jov su dem Fetz e „Ottogramm“.
Dä Jung bedankten sich och stramm.

Hoot zo, wie mer im wiesen deit,
dat schläch ess, wann bei „Jäl“ mer jeit.
Sing Mamm, die stundt dobei un saat:
„Dat hätt hä alt bei meer jemaat,
wie ich noch wor e ganz jung Weech.
Och domols kräch ich dat Jeseech.

Für mich ess eines ganz jewess:
Dat wirklich unse ‚Schutzmann‘ ess!“

Dat ahle Riehler Bad

Nä, wat ess dat allt lang her,
do ess mer einfach platt,
wo et noch em Jröne jov
dat ahle Riehler Bad !

Ov jroß, ov klein, ov alt, ov jung
sing Freud do jeder hatt,
wann sommerdachs et Sönnche schung
em ahle Riehler Bad.

Et wood jetauch, jehöpp, jespritz,
fünf Bahne schwomm mer jlatt.
donoh woodt löstich Ball jespillt
em ahle Riehler Bad.

Un wor der Papp spendabel ens,
mer Freud aan Wöschjer hatt.
E Pommerillche för der Doosch
jov et em Riehler Bad.

Vörbei die Zick. Do aan der Platz
fingk hück jet anders statt.
Uns bliev nor die Erinnerung
aan't ahle Riehler Bad.

Zoobesök

„Morje jon mer en der Zoo;“
sät die Tant zom Fränzje.
Dat höpp freudig en de Hüh,
määät för Jlöck e Dänzje.

Su ne Zoobesök brengk Freud im,
Fränzje schwärmp doför.
Aape jit et do zo sin
un mänch ander Dier.

Doch, wie off en unsem Levve,
vörm Verjnöge eesch ens kütt
mänchesmol e better Nössje,
dat uns schwer em Mage litt.

Un su sät die Tant dann och noch:
„Leeven Fetz, hüür ens jot zo,
eesch weed sich der Hals jewäsche.
Dun nit fusche, ich loor no.“

Denn dem Fränzje, wie su mänchem,
määät et Wäsche jarkein Freud,
un mer weiß, dat hä dä Vörjang
mänchesmol „verjesse“ deit.

„Wiggerhin“, su sät die Tant dann,
„Bedd, dat och et Sönnche schink,
denn bei Rähn, do jon meer zwei nit,
weil uns dann nix räch jelingk.“

Nächsten Dach, allt fröh am Morje,
steit et Fränzje schun parat,
wie de Tant vun im verlangk hatt,
staats rejeet un fein jemaat.

Plötzlich rähnt et. Aan de Finster
schlage schwere, decke Droppe,
un wat hööt de Tant als eeshtes,
wie se aan de Dör deit kloppe?

Dä Puut, dä kriesch un trick et Näsche,
kann kaum vör Trone spreche:
„Jetz ston mer do, et rähnt un ich
han mer der Hals jewäsche!“

Minge Frisör

Dä fingste Laden ess et nit,
dän et zo Riehl em Veedel jit.
Mer fingk do nit Kristall un Jlanz,
doch kennt in selvs dä kleinste Panz.

Tapete jov et ens vör Johre,
do, wo mer schnigge deit de Hoore.
Hück schmöcke Kaate us aller Welt
de Wäng, wo noch de Fründschaff zällt.

Mer kennt sich Johre, ess per „Do“,
su jingk et allt beim Vatter zo.
Selvs wenn ne andere bellijer wör,
hä es un bliev, minge Frisör.

Fröh am Morje

Ich künnt ming Zeidung fröh allt han,
em Abo köm se morgens dann.
Doch wenn ich opjestande ben
trick et mich zom Lädche hin.

Ben jo Rentner, han jo Zick
un dä Wäch ess och nit wigg.
Drink et ehschte Käffche do,
hüür beim Klaaf dä Lückcher zo,
die e Päusche he dun maache,
miehstens jit et jet zom Lache.

Wat zom Rauche ich muß han
Op der Thek fing ich et dann.
Rätselheffcher för der Kopp,
Woch för Woch waaden ich drop.

För bungte Blättcher, de Frau Schmitz
Kütt zweschendurch erenjeflitz.
Fründlichkeit, dat ess doch klor,
he stets selvsverständlich wor.
Su wünschen mer em Veedel he,
dat es su bliev wie eh un je.

Unse Maat

Hück ess widder aanjesaat
bei uns em Veedel „Wochenmaat“.
Lans de Kirch dann stonn se do,
Maatlück he vun fähn un noh.

Stand bei Stand schön opjereiht,
zom Verkauf steit do bereit:
Ääpel, Schloot un och Schavvu,
Bunne, Öllich suwiesu,

Eier, Obs, wie et jrad rief,
mer fingk et do, selvs wenn et sief.
Brut un Kohche, fresche Fesch,
Jardine, Decke för der Desch,

Blüscher un ne Kleiderrock,
un su mänche Blomestock.
Jet zo lese, dann un wann
höllt mer sich beim Zeidungsmann.

Och jit et, zom Zapperlot,
Rievkohche, die schmecke jot.
Schohn un Strümp noch för de Fööß.
Jeder kennt sich, jeder jröß.

Standjeld fröch der „Maatscharschant“,
fröher wood dä su jenannt.
Wann et „Zwei“ vum Kirchtoon schleit,
pack mer en, su flöck et jeit.
Doch em Veedel weiß mer jo,
ess Maat, sin alle widder do.